

四庫全書

史部

欽定四庫全書

平定準噶爾方略前編卷三十九

雍正十三年秋九月己亥

皇上御極

辛丑

命加賞軍營兵丁

上諭總理王大臣等曰出征兵丁勞苦効力甚屬可
憫現在軍前之滿洲蒙古漢軍兵丁各賞伊家一

月錢糧軍營更加賞一月其在軍營之綠旗兵丁亦加恩賞給一月

命額駙策凌留駐軍營

上諭王大臣等曰額駙策凌忠誠為國實心効力軍功懋著

皇考深加獎賞委以軍營重任今策凌聞

皇考大事必欲急赴京師恭謁

梓宮并見朕躬朕亦思召見之商定軍營大事但現有

準噶爾乞和定界之事甚屬緊要夷使未至正當
嚴防緊備之時額駙責任甚重不可暫離軍營

皇考本欲今秋調平郡王進京公慶復現差往軍營代
平郡王慶復初至不能深悉軍務額駙策凌可專
心一意助慶復商酌辦理候準噶爾夷使復到議
定邊界事竣後再行來京謁

梓宮見朕亦復不遲此際辦理軍務嚴謹防範之事惟
額駙是倚著密諭額駙策凌知之

癸丑

訓飭總理王大臣辦理軍機大臣等

上諭王大臣等曰前內大臣海望自北路軍臺回京

時奏稱鄂爾昆發遣人犯在彼種地並無實濟且

恐日後人數漸多致生事端似應改發他處彼時

皇考以鄂爾昆現有大兵駐劄豈有不能彈壓之理此

奏不合曾經降

旨教導今總理王大臣及辦理軍機大臣等議覆此事

並無定議之語殊有觀望之心及朕降旨諭令再議而王大臣等仍復游移其說介在兩歧是王大臣等尚未知

皇考聖意也朕伏思

皇考之意蓋以此等發遣之犯原係身獲重罪之人其發往軍前種地者乃保全之大恩令其効力贖罪耳若其中果有情罪冤抑不應發往者乃辦理刑名大臣之錯誤自應聲明具奏寬釋其罪方於情

理允協若本無冤抑之情只因其不善開墾遂爾
改發內地以兵丁代之是使獲罪之重犯又不肯
急公趨事者轉得遂其僥倖之心矣且兵丁等平
時職業惟在騎射當差耕種之事非所素習若以
不能力田為辭則將遷移內地之民往耕邊塞之
地乎此事之斷不可行者若以此地不應聚集多
人將嗣後發遣之犯改發他處尚屬可行似此已
發之犯豈有更改他處之理且無論大軍在彼儘

足彈壓即使無兵亦毫無可慮若以伊等不能耕種則自應令該將軍大臣等嚴加督率定為賞罰之條以示懲勸况耕種本非難事豈工作伎藝之比若肯用力人人能之其所以尚且因循未收實效者皆該管官員疎忽怠玩之所致也海望心地純良但識見平常且有固執已見之處伊所陳奏豈可盡以為是爾等之意想以朕降特旨令海望署理戶部尚書且不時召見遂起觀望之心將伊

陳奏之事向奉

皇考申飭者仍復含糊議覆甚屬不合凡辦理天下之事惟有物來順應不可豫存是非可否之見於胸中不但海望所言即莊親王果親王大學士鄂爾泰張廷玉為朕所深加任用亦不可因其所言盡以為是蓋識見不到思慮未周之處人所常有也不寧惟是即朕之諭旨倘有錯悞之處亦當據實直陳不可隨聲附和如此則君臣之間開誠布公

盡去瞻顧之陋習而庶事之不就理者鮮矣諸王大臣等日在左右尚不知朕心未免觀望之意則在外臣工之未曾接對者又當何如乎此事若非朕看出豈不至於錯悞向後當以此為戒並將務盡虛公持平之道曉諭內外臣工共知之

已未

命遍卹陣亡受傷官兵等

上諭王大臣等曰朕聞和通呼爾哈之役諸路官兵

及東路兵丁俱猶豫觀望亦有棄營先回者祇餘
京師右衛之舊滿洲兵奮勇衝擊雖年少者亦皆
効死進戰不退是以盡忠者甚衆此等効力陣亡
大臣官員兵丁忘身報國殊為可憫而未及加恩
者今尚有之從前

皇考所以不即遍卹者特因準噶爾之事未定欲令在
外弁兵愈加黽勉圖功故暫緩之以待事定再行
加恩也今遭

皇考大故準噶爾復陳請乞和朕不可不推廣

皇考隆恩著該部詳確查明將伊等宜如何加恩之處
議奏西路官員兵丁內有似此効力陣亡未及加
恩者亦著查明將如何加恩之處議奏至於出衆
効力身得重傷現在軍營未經敘奏之弁兵亦著
該管大臣等查明具奏候朕加恩

癸亥

命議軍需各款折中定價報銷

上諭王大臣等曰西路軍需從前岳鍾琪辦理之時
草率從事於一切物件定價減少不能敷用又因
用兵日久兵馬加增以致物價日益昂貴而甘涼
肅等處尤甚

皇考聖心軫念欲周知地方情形

特命該處大臣將米穀草豆時價兩月一奏交戶部軍
需房以備稽查近年以來陝甘督撫等奏銷軍需
本章內有照定價者有照時價者更有多於時價

之外者業經該部將不符定價各款駁令查核朕
思各案軍需若概照定價核銷則官員不免受累
若但據承辦官開報竟照時價准銷恐地方有司
於開報時價之時即豫留餘步以為冒銷之地二
者均非公平之道現在奏銷案件若不斟酌定價
則部內察核既無準則而外省奏報亦無所適從
徒為文移往返駁詰咨查於事無益其如何按照
地方折中定價斟酌合宜俾官吏無賠累之苦國

帑無浮冒之弊著總理事務王大臣會同九卿悉心確議具奏其從前駁查案件或竟照時價或即照現議折中定價准其開銷之處亦著一併議奏再軍興以來承辦各官若有借軍需名色派累百姓者著該督撫即行嚴叅重治其罪若該督撫不據實叅奏經朕訪聞必將該督撫一併重處

冬十月壬申

定邊大將軍平郡王福彭奏鄂爾昆築城事宜

福彭奏言鄂爾昆建築城垣共撥滿洲蒙古綠旗兵五千七百六十八名於七月二十日興工城周一千八十丈基厚一丈三尺上廣一丈高一丈四尺築土九尺塚高三尺寬四尺塚間相去各二尺五寸四面共開三門建樓三其西面無樓去蓋屋三間角樓四三面設甕城城外四面濬濠城中亦如之引鄂爾昆河水以為池南門之內兩旁設銀庫米倉收貯軍器等房及兵

丁舖房共二百五十八間北門之內向南十二丈設土臺一高一丈六尺寬十大長五丈臣等謹按前者烏里雅蘇台築城共撥兵一萬一千三百五十名每人計十日給糧八升三合築臺兵一千八百名人賞給羊一隻雍正十二年四月蓋造倉庫撥兵四千四十八名每人日給銀六分又撥綠旗兵一百五十名人賞給羊一隻今築城之兵減半於前每人日給銀六分計工

一月應人給銀一兩八錢折羊一隻價值一兩
另給銀八錢營總以上官每人賞緞一疋其餘
各官半疋中間出衆効力者加賞銀牌一面以
示獎勵城工告竣當即咨部報銷王大臣等議
應如所請奏入

上從之

乙亥

命豫籌邊備事宜

上諭王大臣等曰乃者因準噶爾遣使乞和故令北路大兵撤回駐鄂爾昆其許準噶爾乞和之事雖尚未定朕意以為和與不和總無關係惟在我籌辦協宜計及久遠耳蓋大兵之興原欲保護喀爾喀等若曠日持久我兵屯駐之地悉喀爾喀之地一切需用牲畜及游牧行走不免有害於喀爾喀之生計既於喀爾喀等無益而糜費國帑勞瘁兵力常在極邊屯駐亦非國家之長計遠慮且戍守

之處太遠仍屬無濟當量其近邊要害之地以鎮
守之縱使準噶爾賊寇復萌侵擾喀爾喀之意但
越阿爾台嶺遠行數千里兵寡力微豈能獲利如
欲大集其衆而來近者自額爾得尼招大創之後
銳氣已折又歷年經我兩路大兵拒截人馬傷殘
亦安能一時遽為整理其外況有哈薩克布魯特
與之構難設不自顧悉其游牧以全力深入我境
斷不能獲利何以旋歸耶然在我惟當嚴為之備

雖賊寇潛窺不使得逞必令負創而還則自知震
讐邊境可以永固於蒙古生計與我之兵力國帑
俱受其益至於辦理之道戍兵宜於何處駐劄喀
爾喀內扎薩克游牧之地宜如何守護卡倫如何
安設糧餉如何辦運均俟平郡王到日會同總理
事務王大臣及傅爾等詳悉確議具奏事雖未定
而先事裁審則條理精詳其於久遠之計庶幾有

裨

癸未

定議運米移臺事宜

內大臣海望奏言現今大兵駐防鄂爾昆軍營
所有官駝數萬隻別無所用若以給臺站蒙古
等令其運米則運價大省於蒙古等生計亦有
裨益按自歸化城至鄂爾昆應編置臺站三十
二又自第十三臺由歸化城入殺虎口較之由
張家口稍遠一二百里向者亦嘗於歸化城設

臺今既由歸化城運米請自第十二臺至殺虎口之站悉行移撤仍接張家口駐劄如故每臺請給官駝一百五十隻駝屨繩索一百副三班更代日用駝五十隻運米一百石每年計八閱月可運米二萬四千石臺兵原額六十名今增丁役二十以四十名輪班運米其運米之月加給銀一兩在臺叅領章京驍騎校等各加給銀三兩領催加給銀二兩牽駝往來每臺各給官

馬三十匹計駝四千八百隻馬九百六十匹倒
斃不得過十分之三駝一千四百四十隻每駝
官價三十兩需銀四萬三千二百兩馬二百八
十八匹每匹官價六兩七錢需銀一千九百二
十九兩六錢每年增給蒙古官員兵丁錢糧需
銀二萬九千四百四十兩又每年修補駝屨繩
索三千二百副每副給銀一兩需銀三千二百
兩每年運米二萬四千石一石需用口袋繩索

銀二兩諸項合計需銀十二萬九千餘兩較范毓麟之運價可省銀十八萬二千九百餘兩較都統丹津等之運價可省銀十二萬五千餘兩其臺站應如何移置請令總管五十四辦理尋五十四奏言前者阿爾台一路軍臺曾由殺虎口等處設站後以路繞改設於張家口自第一臺至鄂爾昆拴馬大臺二十五腰站十四戈壁中拴駝大臺四腰站二凡四十五處今既設運

米臺站其腰站當撤者應如海望所奏悉行議
撤自歸化城至鄂爾昆設臺遞報三十二處其
運米自歸化城入殺虎口路實迴遠請自張家
口第一臺至歸化城設八臺歸化城三十二站
用丁役八十駝二百隻張家口以外八站用丁
役四十駝一百隻其移臺之事俟明年夏間青
草盛時辦理王大臣等議覆應如所請奏入

上從之

甲申

定議額爾得尼招運糧事宜

都統丹津奏言今年自歸化城運米赴額爾得尼招凡四萬八百石原議募內扎薩克等牛車一萬輛用喀爾喀等官駝一萬隻已辦理訖臣等伏思官駝宜善牧以備用請以明年喀爾喀等應運之糧不用官駝運送其腳價悉給臣等更募商人駝隻輓運可以節費再者臣現督辦

范毓黻米石事據云毓黻等所借內倉十萬石已納歸化城倉收貯聞今年山西巡撫石麟運米到歸化城多派屬吏竭履從事請明年運米赴額爾得尼招不必由巡撫辦理即以范毓黻還項應用其口袋繩索即以臣等去年節省腳價銀兩在歸化城豫辦庶經費可省應用亦便王大臣等議覆應如丹津所奏明年運米至額爾得尼招用內扎薩克牛車輓載二萬四百石

今丹津送致如故其喀爾喀應運二萬四百石
停止官駝即以脚價付丹津募商人駝隻輓運
至需用之米原議以石麟奏請動撥大同朔平
倉米而山路遼遠犖确不平所費脚價三萬餘
兩明年輓送費亦如之去歲曾以二府厥米十
萬石借給商人范毓鬻今值秋收正當交還之
候莫若令其就近先以四萬零八百石交歸化
城足充明年應運之數餘米仍還原處其口袋

繩索即以脚價銀兩節省辦理定於明年五月起程七月中運至額爾得尼招奏入

上從之

丁亥

命酌減軍營委署官員

先是額駙策凌奏言京城八旗奉天等三處兵丁及家選兵每營二千現今所編每營或三四隊不一請悉編為五隊增委官員章京管轄家

選營中別無間職其管隊章京請以京城所調
餘員摘委驍騎校等即於本營選委再前鋒營
兵丁八百亦酌增委章京護軍校等凡應增委
二百二員悉於現任叅領驍騎校護軍校中遞
陞一等委署護軍校驍騎校一百六十八人即
選兵委署如是則官員兵丁之多寡相當於管
轄巡查征戰調遣一切無悞而糧餉亦不致多
費王大臣等議應如所請尋平郡王福彭等奏

言現今自洪郭爾鄂隆撤還京城滿洲兵二千
巴里坤撤還打牲烏拉兵一千其管轄官員亦
宜均酌委署臣等議以京城滿洲兵二千請每
旗設營總一員叅領五員防禦五員護軍校十
員管轄打牲烏拉兵一千兩旗合設營總一員
叅領五員防禦五員驍騎校十員管轄至是王
大臣等議覆曰前以大兵進勦故策凌等有增
委各官之請今大兵已撤過半所有留駐兵丁

無庸增委平郡王所奏似覺過多請令大將軍酌量減損其已委者於缺出時扣除奏入

上從之

十一月戊戌

命免喀爾喀等應賠駝隻

定邊大將軍平郡王福彭奏言前以輓送軍餉給喀爾喀等官駝一千五百隻今悉倒斃曾令丹津多爾濟等核報據稱駝隻歷年既久倒斃

略盡令各蒙古等並以私駝運送官物臣按前此所給駝隻何以並不遵例歲報數目請以一半許充倒斃之數一半責令賠補王大臣等議覆曰喀爾喀牧放官駝每年倒斃者百隻中例不得過六隻但向值耗損悉蒙

恩免償且喀爾喀等以輓送軍需漸至倒斃似應寬免奏入得

旨此項駝隻交與喀爾喀存收已近二十年又因每

歲運送軍需漸至倒斃著從寬免其賠補

議格勒克雅木丕勒移居推河等處游牧事宜
喀爾喀西部落扎薩克圖汗格勒克雅木丕勒
在察罕度爾附近空圭等處游牧雍正九年因
準噶爾侵犯移居鄂爾昆迤西哈洛那等處以
其地不利畜牧奏乞移推河伊克鄂拉翁金等
處住牧不惟生計可復且與軍營較近効力尤
便王大臣等議請令額駙策凌王丹津多爾濟

上從之

己酉

加恩掩埋烏遜珠勒陣亡遺骸

大將軍慶復奏言臣赴軍營時奉

皇上諭旨聞烏遜珠勒之役陣亡遺骸未經埋藏伊等皆力戰死事之人暴骨原野深屬可憫爾至軍營即選高行番僧二人到所在誦經埋骨臣即遵旨同額駙策凌叅贊大臣欽拜等酌議

皇上如天之仁澤及枯骨不獨死者銜結九泉凡在
見聞莫不感激但方冬遺骸為雪所掩求之難
得臣等請俟明年積雪消釋即遣高行僧二人
大臣一人更撥軍營兵士仰體

皇仁遍索遺骨深埋周掩誦經竣事尋慶復又奏言
乾隆元年三月初旬副都統哲庫同喇嘛朋蘇
克綽爾濟吹達爾朗蘇前鋒統領塔爾瑪善等
到烏遜珠勒盡收所有遺骸掩訖奏入報

聞

庚戌

命卓魯等辦理鄂爾昆屯政錢糧

大將軍慶復等奏言尚書性桂現今辦理軍糧不能親往鄂爾昆屯所今軍前効力原任寧夏將軍卓魯尚屬可用請令駐鄂爾昆總管屯政錢糧等事原任提督周瑛協同辦理奏入報

聞

乙丑

命復喇卜坦為台吉

原任扎薩克一等台吉喇卜坦以烏遜珠勒交
戰時未曾身至軍營隨衆擅歸革職尋格勒克
雅木丕勒奏言喇卜坦兩次出兵奮勇與俄羅
斯議定疆界及輓送米石捐羊助兵歷著勞績
罷斥之後深加愧懼自願効力贖罪現在軍營
實少諳練之人若給與原職當益加感奮王大

臣等議覆喇卜坦可否仍復原職出自

聖恩如允其請此等獲罪者並援例乞恩恐有妨軍政須遍行曉諭必如喇卜坦實著勞績一切優長始准保奏此外不得冒昧妄陳以抑徼幸奏入得

旨喇卜坦著賞給原職

十二月丙寅朔

酌減運米腳價

尚書通智等奏言現今戶部解送明年自歸化
城運米赴鄂爾昆之脚價銀兩至營共三十四
萬四千兩臣等給發脚價時面詢商人並云除
口袋繩索外每米一石給銀七兩已足敷用加
以口袋等項銀二兩計一石給銀九兩較之范
毓鬻等運數每石減四兩扎薩克牛車運數每
石減二兩又臣等於今年內扎薩克官駝一萬
改用牛車一萬輛運送倉米一萬石又節省銀

一萬二千兩官駝留備運送軍需之用又省名
募雜項銀二萬餘兩臣等諸事惟期盡心奏入

得

旨辦理雖善必於衆人等並無弊竇亦竝無艱難則
為更善當節省者自應節省惟不累商人方是朕
之本意此處雪已足矣爾等處所復如何

甲戌

定邊大將軍慶復奏鄂爾昆開墾屯田事宜

慶復奏言臣到鄂爾昆即以種地事與額駙策
凌等相度形勢其地雖寬平然近山高下不一
雖二河環繞其去水遠者亦不能徧溉必須引
水試看方可定議方今積雪徧地河水盡堅其
水土之肥瘠與沙石所在難以立驗且穀種收
穫所宜必俟明年試種後始知又募民耕種不
能一時遽集請於此間撥綠旗兵一百守管綠
旗步兵二百家選兵二百自胡克新至濟爾瑪

台擇水土佳處開墾試種小麥豌豆等又都統
銜董相緯現在察罕托輝嘗任開渠此處引水
灌田及督率兵丁耕種一切請令董相緯辦理
所需耕牛給喀爾喀副將軍等銀令其採買鋤
犁農具等物察罕廋爾有收貯者即令領取應
用未備者令戶部辦理其所解送各種籽粒除
所在已有者取用外餘悉行令歸化城都統由
臺遞送試種一年有效臣等據實以土宜何穀

收穫之數若干堪種田畝可得若干種地人日
用所需若干器械牛種所需若干並當於何處
築堡以居種地人等動支何項一一合計收穫
之數果於

國計有益可行久遠並俟將來詳悉確議具奏王
大臣等覆議應如所請辦理奏入

上從之

戊寅

命喀爾喀扎薩克等詳議定界防守事宜各抒所見
以備採擇

上諭王大臣等曰準噶爾雖遣使乞和而防邊之事
自宜豫籌縱彼極其恭順遵旨定議亦不能保其
久而不變朕意彼之乞請誠與不誠俱可勿論惟
嚴備邊疆而已其嚴備之道又當計其久遠而便
益者蓋我大兵之興原為保護喀爾喀而駐劄多
年既占其游牧之地又用其供運之力在彼誠不

免拮据而內扎薩克蒙古之在軍營者或有一二
無知之徒不免以我等為喀爾喀故以致歷此艱
苦為辭殊不知衆扎薩克蒙古等首先歸順於我

太祖

太宗之時與滿洲無異奔走効力即如一家喀爾喀等
雖在後歸順蒙我

皇祖

皇考歷年惠愛視伊等亦同一家初無二致此次行師

非特保護喀爾喀亦為遍安衆蒙古之計也但為
時既久事多未便經我

皇考洞鑒念黃教生靈欲息軍旅曾降

諭旨朕惟仰體

皇考聖心欲悉撤大兵休息衆人現今在喀爾喀戍守
之兵宜如何撤回應否仍留駐若干駐劄應在何
處其喀爾喀之游牧如何防護卡倫後殿如何安
設之處著詳悉定議具奏再與準噶爾議定邊界

之事已經往召額駙策凌王丹津多爾濟俟其到時令與爾等公同酌議此定界之事乃關係衆喀爾喀之游牧永遠生計必諮詢部衆公同商定始可受益而扎薩克甚多不便並令至京著行文喀爾喀衆扎薩克等將應如何定界及伊等游牧或用已力防守或仍須內扎薩克與滿洲兵保護著各出已見以聞俾知朕之撤兵並非不念伊等而外視之也特籌其生計有益久遠可行伊等其知

朕恩恤之意共計久遠便宜之道定議具奏奏到時朕詳覽眾議其言是者朕將斟酌採用即有未協朕亦容之不加責備也

丙戌

議酌留駐防兵事宜

總理事務王大臣等奏言大兵既撤若喀爾喀蒙古等必需內兵防護請酌留東三省兵五千名駐劄鄂爾昆現今鄂爾昆倉貯米石甚多可

支五千人數年之食其察罕度爾所貯糧三萬
餘石亦應運赴鄂爾昆以備支給又歸化城當
各路通衢地廣土肥若駐兵於此可以保護扎
薩克蒙古等設有調用亦便侍郎德沛曾以右
衛地形狹隘又純係沙磧未便屯兵請移駐歸
化城南伊克圖爾根等處尚書通智曾請於歸
化城西齋吉塔爾築城墾田將來鄂爾昆若仍
用內兵駐防則歸化城只需兵六千請於右衛

兵四千內酌撥三千并軍營所撤家選兵二千
熱河烏鎗兵一千並令攜家駐歸化城若喀爾
喀等自能防守鄂爾昆不必留駐內兵則歸化
城請再酌增兵四千為一萬人令其留戍設將
軍一員總理副都統二員協理所留右衛兵一
千名以副都統一員領之仍隸歸化城將軍管
轄并請

特命大臣一人持通智德沛所奏馳驛往會右衛將

軍岱琳卜歸化城都統丹津根敦尚書通智等
相視形勢其戍兵如何分駐及築城墾田以足
兵食等事詳悉確議具奏再扎薩克蒙古北邊
因保護游牧撥科爾沁等三處會盟兵五千駐
烏爾輝音扎罕撥烏朱穆秦蘇尼特等旗下兵
二千駐達里剛愛今大兵既撤伊等亦令各歸
所在聽候調用再車臣汗部落曾撥兵一千在
邊上游牧操練離游牧處甚遠亦應撤還再哈

密回子等歸順已久亦應駐兵防護今哈密貯米二十萬餘石其賽巴什達里雅壑種田每年可得米一萬餘石不需內地運送現在令查郎阿等酌議安西駐兵事宜若安西增設駐兵五千可即其中撥出二千赴哈密駐守不必更議增兵再哈密安西守邊綠旗兵向隸提督總兵官管轄可以無庸更遣滿洲將軍大臣等奏入上從之

戊子

命停止移設臺站及用駝運糧

尚書通智等奏言前者大兵駐察罕廋爾原於歸化城設臺嗣以將軍宗扎卜奏由張家口直向軍營路近千餘里水草甘美沙磧亦少因議改設頗費帑金後范毓黻等亦遂由此運米今若復議移設歸化城不惟道途紆遠且恐於駝隻有損按每站設駝二百運米三萬四千石間

日一運用駝五十運米百石往返二日稍有阻滯即須三日至第四日再行起運計日而算必八閱月而始畢則自三月初至十月終矣牧放之駝與飼養之駝不同三月草尚未生四月始萌五月駝隻始得飼草若三月即令遞運勢必疲瘦縱十月歇至二月經八閱月疲勞之瘦駝實難以過冬前范毓贛等亦曾以萬駝遞運由察罕度爾至科卜多每站用駝二百隻夫四十

名七八月間駝隻倒斃數千後以不能再運驅
駝仍還歸化城遂至倒斃無餘今各站運米之
駝雖蒙

聖恩許其倒斃十分之三但一經起運不過數年必
至倒斃日多若蒙古官兵不能償還勢必有悞
運務今軍營運糧四萬石現在臺站所運大半
其小半令范毓鬻等別由歸化城用商人輓運
諸商輻輳其運送軍糧兼販私貨即范毓鬻等

亦藉其力若聞設站運米自謂商販不行各變
賣駝馬收拾廬屋異日或糧米不敷別有加運
之事一旦購募無人實屬可虞今合計各站倒
斃駝馬三分增置駝屨等物運米兵弁之糧餉
辦米二萬四千之原價及內地運價繩袋等項
約計每石需銀六兩三錢有奇加以軍營領取
駝隻六千及繩袋駝屨等物馬一千匹價值又
撥用察哈爾土默特人夫六百名支應護送烏

里雅蘇台臺站蒙古人家口與送察哈爾土默特人夫家口自本地前往路費各項合計則顆粒未運之先已費帑金二十餘萬計目今奏定之數由臺站運米二萬四千石需銀十五萬一千二百兩兩臣等悉心籌算詳詢商人亦云用此銀數即可運致鄂爾昆且今軍機事少將來兵數漸減用米漸省應將歸化城之米石暫停量度用兵形勢俟一二年再議移站無礙目前之

運務且留餘地以備他日之增運若因張家口
臺多費鉅一轉移間或量減數站即可節省軍
糧馬匹之費倘急議移站以駝運米先增一番
經費於軍務毫無裨益臣等為軍機起見不敢
因王大臣已定之議稍存瞻顧奏入得

旨此奏甚是交總理事務王大臣等議奏尋經王大
臣等奏言現在鄂爾昆撤回大兵惟留駐五千
名每年需糧自當漸減近范毓贇自請以明年

運送軍前米四萬石不用脚價銀兩徑輓運赴
軍以補從前虧缺之項又察罕度爾烏里雅蘇
台兩處所蓄米六萬餘石並已運至鄂爾昆合
本處所存三萬餘石已十三萬石有奇足支五
千兵丁數年之用無庸更運其議移臺站用駝
運米應停止并通智等所奏明年用內地扎薩
克喀爾喀購募車駝運送之請亦應停止奏入
上從之

壬辰

命卹敘烏遜珠勒陣亡被傷官兵等

定邊大將軍慶復奏言奉

旨恩卹和通呼爾哈受傷陣亡官兵並

諭西路官員兵丁有似此者亦著核奏議卹臣等按

雍正十年七月十四日烏遜珠勒之戰時有調

赴駐防兵三百營總敦珠克扎爾布二人率之

至什伯圖山溝方欲前發會日暮塵埃蔽空呼

聲大起遂合衆并力邀截賊路賊衆繞出我兵之後前後夾攻我亦分兵力戰始擊却之二營總乘勢奪據高險賊又繞出山峯之上憑高臨下以壓我師二營總命驍勇章京尼雅哈率精兵仰攻賊陣奪據高峯護軍桂保等生擒二賊築土壘石施發鳥鎗終夜拒戰賊殊駭懼比天明賊見孤軍形蹟合圍數重畢力攻擊我兵鎗矢齊發殺賊益多直至午初賊兵大集扎爾布

與兵丁二百餘人悉行戰歿存者僅五六十人
箭藥乏竭敦珠克顏語衆人曰我兵少不能據
山當各力戰効死以答

主恩兵丁人人慷慨自誓直入敵陣敦珠克中烏鎗
死餘衆或死或傷初扎爾布被創十一處已絕
至十六日復甦二十一日始至大營臣等察核
訪問始得其詳按烏遜珠勒之役賊以大隊衝
擊我師分為數處遂各奪路而歸惟此戍兵三

百計不反顧感

恩効命存者五十四人受重傷者且四十九撰其義

烈非

加恩旌別殊屬可憫王大臣等議覆陣亡者請一體
加恩負傷者議敘如例奏入

上從之

平定準噶爾方略前編卷三十九

欽定四庫全書

平定準噶爾方略前編卷四十

乾隆元年春正月己亥

命叅贊大臣薩木哈回京尚書性桂暫留鄂爾昆辦
理糧餉候代

定邊大將軍慶復等奏言奉

硃批諭旨薩木哈年邁且身有疾病若彼處必有用
伊之處則留之不然則令來京性桂亦屬老病不

耐彼處寒冷若令回京調理彼處不致乏人亦行
遣回爾等可公同商議辦理臣等以薩木哈病稍
愈但右手右足不能轉動當即護送起程性桂
雖有殘疾若便遣還此間糧餉辦理乏人請於
京中遣大臣一人來軍代之再令還京王大臣
等議覆曰薩木哈性桂並如所請行內閣學士
雙喜現在烏里鴉蘇台辦理糧餉俟撤兵議定
即令雙喜赴鄂爾昆代性桂奏入

上從之

丙午

準噶爾使臣吹納木喀等至京進表

先是議政王大臣等奏言準噶爾噶爾丹策零遣使吹納木喀額塞約於正月十一日至京至時令自長安左門入午門左翼引至箭亭前跪奉表文及進貢方物大臣閱畢受所進表文繙譯呈奏外引使臣至上駟院

賜飯畢自右翼門出西華門令伴使各官館之於
豐澤園定以某日引使入

覲至日入班大臣議政大臣咸集各攜坐褥至

乾清宮以次就列前引大臣十人入坐後扈大臣
二人侍立並如常儀

御前侍衛近

寶座前侍豹尾班侍衛立

寶座兩旁

乾清門侍衛列豹尾班後月臺兩旁每翼排立侍衛二十人

乾清門兩旁各排立侍衛班領一人侍衛二十人階下兩翼各侍衛二十人後右門侍衛二十人凡使臣所過門令前鋒統領護軍統領等增列護軍叅領護軍悉令嚴整是日清晨令伴使官引使臣自西華門右翼門入至後右門

皇上陞

乾清宮

寶座令侍郎納延泰班第副都統多爾濟奏事侍衛
等引使臣入

乾清門右門由西階上使臣吹納木喀額塞及隨
從厄魯特等分立於

丹墀中路左右行三跪九叩頭禮禮畢引入

乾清宮西邊榻扇內使臣一叩坐於右翼首行大
臣之末稍後隨從之厄魯特等坐於榻扇外西

階上

皇上進茶使臣隨大臣等一叩頭

賜茶使臣一跪跪領

降旨使臣跪聽事畢使臣退出西邊榻扇自後右門

西華門還館所其日大臣等悉常服奏入

報可至是吹納木喀等至京進獻表文并獻貢物吹

納木喀等聞

世宗憲皇帝升遐悲感良久始言此乃天定之數無可

如何今惟祝延

聖上金甌鞏固國祚萬年永享太平耳又言我等至
游牧即欲速來以嚙爾丹策零病甚留待稍愈
是以遲來其嚙爾丹策零所上表文云奉

大皇帝諭旨朕軫恤羣生欲弭兵端以興黃教遣使諭
爾爾亦悅服奏言若使後世謂某皇帝與某台吉失
好興戎誠非美名今歸和好則休聲垂於永久朕披
覽之下深為嘉許又奉

諭旨爾前奏言喀爾喀游牧逼近爾屬未免疑懼請稍
展空地此議亦屬可行仰見

大皇帝興教息民之至意曷勝懼忭又奉

諭旨前噶爾丹為我兵所勦滅全收其疆土及其骸骨
妻屬爾準噶爾部人從無越阿爾台游牧者請舉當

時情事詳悉陳之我父幼時與博碩克圖汗同
居共事後彼漸強盛既害其弟又欲潛圖我父
歲在己巳我父年四十七與彼交惡收其土地

人民之半建牙於額林哈畢爾噶之地彼發兵
來攻我大敗於烏蘭烏蘇庚午彼興師內犯我
父即日奏聞

聖祖仁皇帝復親率所部夾攻其後辛未克取其撒克
里烏蘭古木之地丙子彼為

大國所敗丁丑死於阿查阿木他泰後其屬北歸
丹濟拉挾其骸骨妻屬居庫克德卜僧我舉兵
攻之獲其骸骨妻子及屬人大半丹濟拉率數

人逃遁奉

旨索取博碩克圖汗骸骨我即遵

旨函獻自癸未至今我明阿特部落遂游牧於科卜多

屬下烏梁海人亦頗有居其地者癸巳胡土克

圖曾使楚揚託音與車木冲那木扎爾之使賴

冲楚揚多託諾丹津多爾濟之使達什敦多卜

王之使綽當博貝之使丹巴五人同至我國實

用科卜多烏梁海人為嚮導甲午與我使那木

西喜同來之

天使亦在科卜多供給止宿諸人今尚有存者諒亦共知其事前者奉

諭旨云若追論前事則勢無了期故前此未敢瀆陳竊思阿爾台本我游牧之地杭愛乃喀爾喀游牧之地既經和好此疆彼界原不必縷分條析又以

諭旨有欲成和好須明疆界之語因念

諭旨所載哲爾格西喇呼魯蘇等處雖已指明我部邊界未經指明

大國邊界故尚未能妥議具奏祈再降旨命使來此酌議俾我之衷曲得以悉達又

諭旨本有稍展空地亦屬可行之語故敢奏懇彼此邊界令其隔遠則衆生永安而黃教益興矣伏祈大皇帝睿鑒允行隨表恭進貂皮三十五張乙卯年十

月十一日奏入報

聞

壬子

賜準噶爾使臣吹納木喀等入

覲

上諭吹納木喀等曰去歲守邊大臣奏爾等已至朕

甚忻悅非特為爾準噶爾求和之故思仰副我

皇考闡揚黃教休息生靈之意也今聞噶爾丹策零表

文並不遵

皇考諭旨定界漫指前奏未允之哲爾格西喇呼魯蘇
等處為爾部邊界欲於喀爾喀境內更留空間之
地是誠何言又云既經和好不必分界我大國視
準噶爾之和與否定界與否原無關體要但定界
之事起於伊父策妄阿喇布坦奏請其初意止欲
得阿爾台山外哈道里哈達清吉爾布拉清吉爾
等處而已

皇考尚不允其請後因撤兵息民竟以其地賜之以克

木齊克汗騰格里循阿爾台山梁下索勒畢嶺至
哈卜塔克拜塔克之中過烏蘭烏蘇至噶斯口為
界又允伊父所請以呼遜托輝至喀喇巴爾楚克
作中間間地今爾等至京請和若不議定疆界何
以為信且能保邊境小人異日不起爭端乎若噶
爾丹策零但求喀爾喀無踰哲爾格西喇呼魯蘇
尚可俯允不然朕遣使何為爾等至此亦何為朕
知噶爾丹策零本無求和之意特借此牽率奏請

希圖通市之利耳所見如此能不為朕所恥笑若能遵

皇考諭旨定界朕必格外施恩所得不更多乎我

皇考惟以闡揚黃教休息生靈為心朕深體

皇考之心興教安民而外初無用兵之意縱爾部欲激

發朕怒亦斷不勤兵於遠也朕不但欲令我內部

喀爾喀各安其生視爾準噶爾部人亦如我赤子

業已定議撤兵止少量留守邊此爾等所共知

朕欲天下之民舉安即守邊之事亦與和不和無涉也噶爾丹策零嗣後能體

皇考與朕之心則遣使來不然各保其境可也倘更不自揣量犯我邊境朕自有辦理之道以天朝之威靈兵臨爾部尚不獲全利爾準噶爾螳臂之力勞師涉遠豈能有濟爾還其明告噶爾丹策零令更熟思審處定議具奏吹納木喀奏曰

大皇帝諭旨當謹記歸告噶爾丹策零其所陳奏實

遵

成佛大皇帝旨意欲振興黃教安逸衆生所以輸誠上
請非敢借遣使以圖通市也

上諭曰噶爾丹策零如無此意甚善但興教安民乃
皇考與朕之事非噶爾丹策零之任也縱彼實力行之
止及準噶爾一小部落耳俾天下萬國蒙被麻澤
其事自在朕躬且爾言實遵

成佛大皇帝旨今日噶爾丹策零之奏與前次

皇考諭旨合乎否乎果欲定議當就事論事何得牽引
遠年噶爾丹之事如此瀆陳往復真無了期矣爾
等不過奉使之人成則與有榮施不成則空勞往
返定界之事誠非爾等所得擅議朕當另遣大臣
前往爾起程時有勅書付爾噶爾丹策零體朕
意謹遵

皇考原旨定界可再遣使來不然亦無庸復遣其遣使
當仍遣爾來至我邊界時可告我守邊大臣噶爾

丹策零表文內有遵旨定界之語方許入境如無此語決不許入也聞爾等仍携貨來不忍復令携歸可留住數日貿易事畢起程可也尋

命賞給吹納木喀等袍緞銀布有差

癸丑

議留兵駐防事宜

總理王大臣等奏言前者以兩路撤兵事宜候額駙策凌王丹津多爾濟到時會議今已會議

大兵撤後宜留兵數千於鄂爾昆駐防一二年
間觀其動靜庶我兵之威聲既振而喀爾喀等
亦藉以安心即有調用亦為易集請於現在軍
營東三省兵中留奉天兵二千吉林兵一千呼
倫貝爾索倫巴爾虎兵二千暫駐鄂爾昆其李
如栢率往更代綠旗兵四千中請留直隸山西
省兵一千防守鄂爾昆所在城郭倉庫即以李
如栢領之餘兵聽大將軍酌量調遣年滿更代

綠旗種地兵及罪人仍暫留種地其在扎克拜
達里克充兵及種地罪人一百三十人於雍正
九年賊人來侵嬰城固守

特恩寬免其罪許充民兵仍令種地今議撤兵應令大
將軍給以口糧發回原籍願充兵者令充本處
兵願為民者聽之其備用喀爾喀兵一千五百
名請留一千於烏里雅蘇台給巡視卡倫出哨
瞭望報信放馬等差於喀爾喀副將軍以下用

大臣一人領之餘兵五百仍駐鄂爾昆備調遣
牧放之用以喀爾喀副將軍一人更番領之烏
里雅蘇台既有駐兵即有轉遞信報運給糧餉
等事就軍營簡部院章京一人駐劄辦理此外
一切滿洲蒙古漢軍綠旗兵丁俱俟青草出時
令大將軍陸續遣還本處再前者以運米維艱
令月給喀爾喀兵羊價三兩以當月糧今烏里
雅蘇台積米甚多令大將軍等合計駐防及臺

站卡倫各項兵丁應給米石多寡之數斟酌留
貯其餘糧餉并軍器等物辦官駝一萬隻馱載
即以烏里雅蘇台所撤兵五千護送至鄂爾昆
收貯其推河扎克拜達里克二處所貯各項亦
令大將軍酌辦一併運赴鄂爾昆軍營現貯甲
冑弓箭鳥鎗火藥帳房鑼鍋帽帶靴鞋緞布等
物甚多令大將軍一一檢點應收貯者收貯應
賞給兵丁者酌量賞給又職官新至者量留備

用餘並遣還內閣學士雙喜暫行留辦糧餉戶部員外富明安令同雙喜辦理再令將軍一員總統兵丁叅贊二員協同將軍辦事大臣五員分隊掌管留駐兵丁庶於邊疆之防守國家之糧餉蒙古之生計馬匹之牧養均有裨益至

命遣大臣頒給將軍印

勅再行請

旨奏入得

旨大兵既撤將軍公慶復俟撤兵及一切事務畢後
即行來京現在留戍之兵並非常駐數年後即行
撤回不必另派將軍著留副將軍印令額駙策凌
暫行統轄再派叅贊大臣二員協同辦理餘依議
尋總理王大臣等以現在軍前領侍衛內大臣
伯伊勒慎護軍統領阿成阿哈岱三人開列請
旨命為叅贊再駐劄鄂爾昆綠旗兵一千名令李如
栢管轄外其東三省兵五千應令大臣五員管

轄請以副都統綽爾多蘇爾太轄奉天兵二千
副都統富達禮轄吉林兵一千副都統銜齋三
總管托爾德爾轄呼倫貝爾索倫巴爾虎兵二
千并請給托爾德爾副都統銜奏入得

旨伊勒慎等三人皆近日往代者俱著留充叅贊大
臣之任托爾德爾賞給副都統銜令管索倫兵餘
依議

命免甘肅借給口糧籽種

上諭內閣曰甘省百姓承辦軍需急公踴躍甚屬可
嘉

皇考屢沛恩膏朕亦彌加體恤上年聞有缺雨歉收之
州縣已諭該督撫加意撫綏務令貧民得所除散
賑米穀外所有借給口糧籽種之類例應秋收徵
還者悉行賞給免其還項該督撫可通行曉諭并
飭有司實力奉行毋使胥吏土棍侵蝕中飽

甲寅

命都統王常侍郎栢秀往勘屯田

總理王大臣等奏言鄂爾昆既定議駐兵種地
所有應墾地畝宜令大臣往勘恭候

欽命并持尚書通智侍郎德沛原奏前往公同詳議
具奏奏入得

旨著都統王常侍郎栢秀前往

命議更定臺站事宜

總理王大臣等奏言今鄂爾昆酌留滿洲蒙古

綠旗兵六千五百烏里雅蘇台酌留喀爾喀兵
一千所有臺站事宜亦應更定臣等原議御史
常明所奏鄂爾昆以外十八站蒙古等兵俟青
草發生時內移於運米臺站安插每站撥兵十
名章京一員駐防遣小台吉二人軍營侍衛二
人周行巡察其應給行糧如卡倫官兵例給予
所有馬駝乾糧羊隻著留半備用令管臺站員
外五十六筆帖式尚圖仍留管理悉經議行今

臺站既停運米烏里雅蘇台扎克拜達里克推
河等處所有滿洲綠旗兵悉撤還止留喀爾喀
兵一千於烏里雅蘇台連接卡倫巡查瞭望所
有鄂爾昆以外十八站蒙古兵應悉撤之其由
鄂爾昆至烏里雅蘇台各臺站相接如故自鄂
爾昆抵張家口臺站二十九侯歸化城駐劄滿
洲兵時令自歸化城置臺接至鄂爾昆庶兩處
軍營聯為一路彼此信息相通再大兵既撤臺

站止令給差每臺置兵六十名過多應行議汰
所需馬駝乾糧羊隻應減若干現在罪人悉已
停發其載送牛車二十輛應歸何處坐臺官一
人應管幾臺請令總管五十四等詳議具奏到
日再議奏入報

聞尋五十四等奏言自張家口至鄂爾昆大站二十
九腰站十六每大站留四十戶披甲者二十名
設章京驍騎校領催各一員每腰站留二十戶

披甲者十名設驍騎校領催各一員仍以叅領
四員分管其汰去兵丁所留器械查明收貯俟
有毀壞者即以此補之叅領章京驍騎校每月
各增給銀三兩領催二兩披甲一兩烏喇齊五
錢叅領給五品銜章京六品領催七品又大站
二十九其拴馬者二十五每站馬八十匹請留
五十匹拴駝者四每站駝五十隻請留四十隻
腰站十六拴馬者十四每站馬四十匹請留三

十匹拴駝者二每站駝三十隻請留二十隻凡
汰馬一千有十匹令管站阿蘭太等於倒斃馬
匹錢糧中抵用減駝六十隻分撥各站作馱載
之用至臺站現留馬駝並許倒斃十分之三第
二十九臺適當遞送交會之所第十五十六臺
並與張家口賽爾烏蘇兩處臺站所管地接壤
請於此三臺各駐官一員其餘四十二處每二
站駐官一員自昌平至張家口向設大臺站七

嗣以事煩又自回龍觀至邊上增設腰站十四
今大兵既撤此四十處並應裁汰王大臣等議
覆曰現在臺站減撤喀喇沁土默特人等並携
家口同行各有零雜什物必需車輛運載應令
五十四以臺站所有車牛選給備用其餘著分
賞留臺蒙古等現在坐臺官二十四員內高起
等四員甫經發往又慶復等奏應待三年期滿
者十員應並令留臺俟期滿更代尚缺十員請

於在京筆帖式內撥往應令回旗者著五十四
遣歸回龍觀至宣化臺站本以給西北兩路之
用北路由張家口西路由宣化大同等處西路
既撤北路亦宜一體議減其應撤與否請交兵
部定議餘悉應如五十四等所奏行奏入
上從之

乙卯

命護軍統領費雅思哈尚書海齡等次第回京

總理王大臣等奏言大兵既撤烏里輝音扎罕
達里剛愛車臣汗等處操演豫備兵丁一併停
止其監視操演烏爾輝音扎罕護軍統領費雅
思哈尚書海齡侍衛阿敏道監視操演達里剛
愛散秩大臣四格額駙興德尚書特古特侍讀
學士巴特瑪並令還京再前者駐劄監視車臣
汗辦事侍郎塞楞額郎中麒麟保監視圖謝圖
汗郎中蘇章阿根都思赫監視扎薩克圖汗侍

衛常義主事阿穆瑚朗原議駐戍兵定議時悉
行撤還今已定議所有塞楞額麒麟保蘇章阿
根都思赫俟大兵起程後撤還常義阿穆瑚朗
俟扎薩克圖汗部落蒙古移徙畢亦令還京奏
入報

聞

丙辰

恩免哈密回部屯田交糧並加賞貝子額敏等

哈密貝子額敏奏言自軍興以來雍正八年至十三年令部人耕種屯田輸納糧米合計二萬七千五百石現已動用一萬八千石存者九千五百石今大兵既撤應否仍令耕種納糧總理王大臣等議覆曰回人每年官給籽種五百石收穫時納米四千石每石賞銀一兩現今大兵既撤哈密止駐兵五千從前運到米尚存二十萬石有零應移文大將軍查郎阿等自今年為

始免令回人納糧貝子額敏急公效順督率部
下種地協助軍需請

恩賞大緞十端種地回人分賞銀一萬兩奏入
上從之

癸亥

命珠密納木扎爾兼轄喀喇烏蘇厄魯特兵以塞臣
哈什哈承襲扎薩克頭等台吉


辦理藏務副都統瑪喇等奏言統轄喀喇烏蘇



兵扎薩克頭等台吉那顏和碩齊卒臣等與貝勒頗羅鼐酌議可代者據云其次子頭等台吉珠密納木扎爾年富力強每年四月率塔木騰格里淖爾厄魯特兵操演練習防守卡倫塔木地去喀喇烏蘇甚近請即令其兼轄至那顏和碩齊之扎薩克頭等台吉有其弟塞臣哈什哈現在古木布駐劄辦事妥協請即令其承襲王大臣等議覆應如所請奏入得

旨依議其那顏和碩齊之扎薩克頭等台吉著其弟

塞臣哈什哈承襲



平定準噶爾方略前編卷四十

欽定四庫全書

史部

平定準噶爾方略前編卷四十一至

詳校官監察御史臣孫家賢

通政使司副使臣莫瞻菴覆勘

總校官進士臣朱 鈐

校對官中書臣李斯咏

謄錄監生臣李亭植

欽定四庫全書

平定準噶爾方略前編卷四十一

乾隆元年二月戊辰

命緩陝西本年應徵半賦

上諭總理王大臣等曰陝甘民人自軍興以來急公
効力甚屬可嘉除屢年叨蒙

皇考聖沛恩膏外朕又降旨將本年應徵錢糧甘省全
數豁免陝省止徵其半以昭格外之恩但查錢糧

完納例有定期上年陝省收成未稱大稔今年春夏之際未免輸納艱難著將應徵一半額賦寬至夏禾收成後再行開徵以紓民力至該省應用兵馬錢糧著該撫豫先籌畫另行撥給俟九月徵收之後各歸原款報部查核可即傳諭該部知之

命送策凌母還游牧並賜整裝銀兩

上諭總理王大臣等曰額駙策凌總統北路軍營其母現在京師策凌不得常見恐其思念不置可令

其母還游牧處所俾得定省用展孝思此行著蘇巴什里送往并賞銀五千兩以備行裝

丁丑

命籌辦軍營貯米事宜

上諭總理王大臣等曰現在軍營貯米甚多足供數年食用又經通智等運致數萬石將來彼處駐戍兵丁為數無多不必需用如許米石若收貯日久恐有霉爛之虞軍興以來喀爾喀等頗為出力近

又習慣粒食若將軍營所貯之米搭放支給則米石既不致霉爛於喀爾喀亦屬有益再綠旗兵每年種獲新糧入倉收貯更可留新出陳其如何通融辦理之處著詳悉籌議具奏尋王大臣等奏言大將軍慶復前奏鄂爾昆等處現貯米二十萬餘石中有青稞麥子大麥小黃米二萬餘石軍營所有將軍大臣官員兵丁以至僕從等凡五萬餘人每月需米七千餘石至五月青草出時

令所撤兵丁起程又需辦給行糧自五月至八月共需米五萬餘石開除前項仍存米十四萬餘石臣等前議撤兵事宜應留兵一千五百名喀爾喀兵及守卡倫兵並酌支米石近又議每年夏秋時用喀爾喀兵三千名於鄂爾昆附近屯駐俟撤巡哨兵時再令撤還此兵既在軍營亦請每月賞給羊價米糧自將軍以下至僕從等凡一萬六七千人一年需米約五萬石計軍

營存米十四萬餘石再益以通智范毓麟運致
米石足供四年食用臣等大概籌畫如此至每
年種地收獲新糧入倉存貯出其陳者務令不
致霉爛請行文大將軍慶復詳議具奏奏入

上從之

己卯

賜準噶爾台吉噶爾丹策零勅書

奉

天承運

皇帝詔曰諭噶爾丹策零朕纘承大統繼述

皇考世宗憲皇帝之志無分中外一視同仁以振興黃
教安養衆生為務今爾遣吹納木喀來奏稱阿爾
台本我游牧之地杭愛乃喀爾喀游牧之地既經
和好此疆彼界原不必條分縷晰今因遵

旨定界故敢奏聞又稱

諭旨所示哲爾格西喇呼魯蘇等處雖已指明我部疆

界尚未定喀爾喀游牧之界故未敢定議祈再稍
展空地遣使來此酌定令喀爾喀與我部邊界彼
此濶遠伏乞允行按定界之事本起於爾父策妄
阿喇布坦奏請乞以阿爾台山外哈道里哈達清
吉勒布拉清吉勒兩隅賜爾初尚未蒙

俞允其後

皇考一意休兵息民方可其請令以克木齊克汗騰格
里循阿爾台山梁下索勒畢嶺由哈卜塔克拜塔

克之中過烏蘭烏蘇至噶斯口為界爾父又請以
呼遜托輝至喀喇巴爾楚克為居中間地毋與喀
爾喀游牧逼近致彼此猜疑

皇考降旨此事亦屬可行今爾誠恪遵我

皇考聖訓奏請則我原設卡倫不必動移但令喀爾喀
游牧稍稍內徙朕自當體

皇考興教安民之意降旨俯允爾乃並不遵我

皇考之訓竟欲以哲爾格西喇呼魯蘇為爾邊界專令

喀爾喀內徙別留中間濶遠之地牽率奏請明係
托故支吾如此則朕更遣使何為朕為萬方共主
當使羣生皆得其所不但軫恤內地蒙古即爾準
部亦在我撫綏之內仰承

皇考仁育萬物之心以息兵端業已降旨撤兵豈復更
張爾若不恤爾部起釁殃民勞爾部衆擾我邊疆
則朕亦無如之何矣爾台吉其圖及久遠將一切
利害得失之故再四思維詳悉定議一遵

皇考諭旨則遣使來奏否則不必更遣使矣特降勅諭
付爾來使齎還隨勅賜各色緞俱十端

庚辰

命議駐兵備邊事宜

總理王大臣等奏言本月十三日奉

上諭前經降旨北路撤兵駐兵事宜令喀爾喀衆扎
薩克等各陳所見今四部落悉已奏到爾等會同
額駙策凌王丹津多爾濟定議具奏臣等會議據

署喀爾喀副將軍成衮扎布等奏請就四部落
選兵七千於庫卜克爾駐兵一千卓克索等處
駐兵五千特斯駐兵一千三處各築一城令其
防守喀爾喀游牧不得越百里之外有事可就
近入城伊綑等處現在修廟亦令更築一城附
近游牧者得入居之其拜達里克察罕廋爾推
河塔米爾等處所駐內地兵悉撤還惟鄂爾昆
應暫駐滿洲蒙古兵一萬以備探信迎敵據扎

薩克圖汗格勒克雅木丕勒等奏請精選內地
兵一萬三千於鄂爾昆屯駐一萬烏里雅蘇台
屯駐三千察賊動靜以定進止其三十三卡倫
撥兵駐劄如故又請西三部中選兵一萬車臣
汗部中選兵五千於鄂衣袞特里墨台西里兩
處各駐兵一千五百其餘一萬二千令所在副
將軍扎薩克等不時操演以備調發其扎卜堪
台西里空圭特斯等處仍設內卡倫令蒙古游

牧無過察罕和羅畢留台齊老圖塞楞額等處
據車臣汗達瑪琳等奏請於喀爾喀西境額爾
得尼招等處水草肥美之地悉駐兵固守安設
卡倫俟探知賊人確耗再議撤兵據署副將軍
貝勒策卜登等奏滿洲蒙古兵駐劄各路誠屬
有益但準噶爾既遣使請和若不撤兵彼仍懷
疑請悉撤駐兵其卡倫置設如故令游牧人衆
各備器械加以約束庶合機宜臣等伏思喀爾

喀四部落扎薩克等各抒已見雖所議不同並以防賊備兵為主前者臣等酌議用東三省兵五千綠旗兵一千駐鄂爾昆用喀爾喀兵一千駐烏里雅蘇台又五百名駐鄂爾昆業已奏行無庸更議其喀爾喀之逼近軍營者當應行防守時更令增兵以助軍威自屬有益若邊境無虞經年屯戍未免勞費請於每歲防秋之候就各游牧豫備兵中輪選三千名在鄂爾昆附近

水草佳處屯駐令隨大兵逐獸行圍練習技勇
俟撤巡哨兵時再行停止其餘兵丁並令所在
整頓豫備以候調遣毋或失期又格勒克雅木
丕勒等所奏扎卜堪台西里空圭特斯等處仍
設內卡倫蒙古游牧無過察罕和羅等處應如
所請并令副將軍等自明年為始悉行設立嚴
謹查察其豫備兵隨時操演整備器械之處著
軍營將軍大臣與喀爾喀副將軍等公同酌議

隨宜辦理奏入

上從之

辛巳

命那蘭保督運軍糧

先是總理王大臣等以鄂爾昆貯米甚多移令
歸化城尚書通智等代內扎薩克所運四萬米
石停其運致通智等奏言咨文未到以前已發
給商人腳價八萬餘兩令其置辦一切不便收

還請令范毓麟應運抵欠米四萬石暫行停止
仍以前項運致軍營王大臣等議覆范毓麟所
運米石大半已抵鄂爾昆其餘亦多啓行今通
智所運米須五六月始得起程必無盡給商人
脚價之理應准其運致一半奏入

上從之尋通智奏言所運米二萬石商人先於去冬
飼養駝隻請於二月內即以次起程應遣大臣
一人土默特大員八人官員十六人兵丁一百

名送往即令尚書性桂等監收又奏言都統丹
津良敦副都統席爾塔五十六那蘭保並自請
前往効力恭候

欽命奏入得

旨著那蘭保前往

三月乙未朔

命加恩叙賞前後坐臺官弁兵丁

上諭總理王大臣等曰西路軍興以來自京城以至

西寧沿途增設腰站齎送公文雍正九年蒙

皇考世宗憲皇帝念弁兵遞送勤苦加恩議叙賞賚但自八年七月起至九年六月止兩次撥委弁兵叨蒙恩恤其餘未曾賞及朕思八年以前已安臺站九年以後尚未撤除前後同為効力之人當令均沾恩澤著該部確查辦理將前後坐臺之官弁兵丁遵照雍正九年之例或賞紀錄或賞銀兩一體加恩以示朕一視同仁之意

丁酉

議分給兵丁米糧羊價事宜

定邊大將軍平郡王福彭奏言向者蒙古兵例
不給糧臣前以坐卡兵丁支領羊價殊屬煩瑣
是以折給米石前伊等或用米磨麩對茶或轉
賣與商販現今貯米甚多給糧誠便倘日久米
少議停不無轉生缺望嗣後或更須駐兵亦難
以一例支給按北地寒冷蓋藏得宜米可經三

四年不壞現在米石自當貯以備用其蒙古兵
丁仍請給羊價殊為便益王大臣等議覆防秋
兵三千每年暫駐數月又與游牧所在相近無
庸支給米石應如平郡王所請仍給羊價其駐
劄兵一千五百與防秋兵不同應令平郡王以
本處所存倉糧如糜黍青稞蕎麥不耐潮熱等
物間給以為磨麪對茶之用再索倫性情與蒙
古相近請一體議給其如何間給之法應令慶

復辦理尋慶復等奏言向有間給二麥之例每
年三月至九月官兵支領月糧每月量給大麥
六日麥二日糜黍一日駐劄兵即照此例行王
大臣等議應如所請奏入

上從之

議增設馬廠事宜

定邊大將軍平郡王福彭奏言喀爾喀部落所
牧馬匹除留軍營備用外各游牧處現有馬二

萬九千餘匹內扎薩克各游牧處現有馬四萬餘匹伏思鄂爾昆駐兵以歸化城為聲援其間相去三千餘里中途須有接應更換之馬請度適中之地與臺站相近水草佳處撥馬二萬匹設立馬廠於土默特兵或喀爾喀兵內擇有眷屬者移駐牧放令通智丹津協理其事再請撥驢馬一萬匹兒騾馬一萬匹令五十四撥入張家口外官廠中一并牧放以備需用總理王大

臣等議覆曰口外行走全資馬力必平時經理
得宜孳生蕃衍庶幾備用無缺今據平郡王請
於歸化城至鄂爾昆中間附近臺站設立馬廠
牧馬備用誠為允協但馬廠應設何處於蒙古
游牧有無妨礙并以何處兵丁牧放及一切應
辦事宜令通智等遣官察勘詳議具奏至張家
口馬廠增馬之請前者內大臣海望亦曾奏請
以五十四等言採買馬匹擾累蒙古應俟徐議

是以未經允行今平郡王奏稱官馬甚多不須更購按現在各扎薩克驕馬已經定議每年倒斃數目准其開除將來倘有需用自可調集況現今五十四所管馬廠內有王公等所進馬八千餘匹可以備用不必更以扎薩克驕馬調入其請增兒騾馬萬匹於牧放孳生最便應令額駙策凌同三路副將軍等計各處現存兒騾馬數目並如何游牧孳生之處詳議具奏到日再

行定議奏入

上從之

辛亥

命提督樊廷總統哈密防兵

署寧遠大將軍查郎阿奏言原議甘涼等處撥兵五千固原等處撥兵五千往駐哈密應設總統提督一人請於陝西提督樊廷甘肅提督二格二人中用一人奏入得

旨駐防哈密總統提督著樊廷去其固原提督印務
著河北總兵李繩武前往署理

癸丑

命撤勇健營兵丁

署寧遠大將軍查郎阿奏言巴里坤議撤官兵
有勇健營兵一千一百餘名原係新設別無營
汛其撤還時若仍聚一營難於部署且屬十五
省挑選技勇之人應令各歸本省就近遇營兵

缺出即以充補其願告退者聽如有勤勞素著
技勇可觀者即酌量拔補其不法生事者隨時
咨部斥革撤還時長途進止應有官弁統轄請
即以原領將弁等分領約束到時留本省照銜
補用其經過各處所需車輛船隻口糧並如例
支給總理王大臣等議應如所請奏入

上從之

乙卯

議移改臺站事宜

臺站總管五十四等奏言查第二十一臺至鄂爾昆一路水草甚佳且里數較直因令郎中常保往勘據云沿途井泉溪河隨處相接較今臺站近二百餘里除二十一臺毋庸更動外自哈畢爾噶腰站至第二十九臺議汰腰站一處其餘應行遷移安駐大站腰站凡十一處並將地名里數開注呈送請如所勘辦理其所汰腰站

並如原議人歸本處馬付管臺官以抵錢糧駝
及廩給羊隻備各營應用總理王大臣等議應
如所請奏入報

聞尋協理軍臺事務總管覺和托奏言臣閱新移臺
站彼此相去遠近不齊請將二十四臺移於東
北十五里之克勒扎拉腰站移於東北三十五
里之桑袞達賴二十五臺移於正東十五里之
齊希勒達克岱丁薩腰站移於正東三十里之

哲格蘇台二十六臺移於正東五十里之西巴爾圖二十七臺移於東北四十里之烏蘭淖爾常保前次並未詳勘請交部察議得

旨常保免其議處該部知道

丁巳

命弛邊民越界種地之禁

先是延綏總兵官米國正奏請以蒙古餘閒套地明展界限令邊民並得租地耕種議不准行

至是米國正復奏言邊民違例越界蒙古私得
租銀習以為常已非一日其牛具籽種隔年已
費且蒙古復有豫支民租三四年者現今榆林
神木等處邊口越界耕種之地約三四千頃歲
約得糧十萬石可敷數萬人食用今驟行嚴禁
致令銀地兩虛待哺無策雖於令制相符實與
下情未便臣巡察邊汛至神木一帶百姓紛紛
控訴應與扎薩克酌量通融籌議俾邊民生計

相安總理王大臣等議覆邊民種地設立界限
原恐於蒙古游牧相妨今如米國正所奏邊民
藉以獲糧蒙古藉以所租彼此兩得其便事屬
可行惟強種勒索滋生事端者悉行禁止奏入
上從之

戊午

恩免范毓勳辦理北路軍糧處分

總理王大臣等奏言戶部核奏范毓勳辦理北

路軍糧冒銷腳費有

旨令臣等議奏臣等查察罕度爾軍糧康熙六十一年以前遣官辦運每石自一百餘兩至四十兩不等至雍正六年怡親王奏令范毓黻承辦每石定價二十五兩雍正七年范毓黻報出節省銀一百餘萬兩後即以節省之數核算每石給銀十九兩其運送扎克拜達里克并推河等處每石給銀十一兩五錢至十五兩惟運送科卜

多每石給銀二十五兩至二十八兩此並在未
運之先計按道里遠近給與運價雍正九年十
月奉

旨軍糧關係重大錢糧不足只令請領有餘不必報出
毋得止圖節省再查前以輓運科卜多糧中途改撥
鄂爾昆等處收貯經戶部核減銀二百五十餘
萬兩已扣完八十餘萬兩尚存一百六十餘萬
兩現在定限追繳再雍正九年十年沿途搶失

米石得

旨准其開銷後范毓鬻呈報共失米十三萬餘石戶部亦未代奏准銷總計范毓鬻前後承辦軍糧一百萬餘石其每石領銀二十五兩至二十八兩者共十四萬餘石餘悉十一兩五錢至十九兩不等經戶部詳詢范毓鬻供言給發運價之外尚有設立米局牧廠及催趲糧運採買牲畜雇募人夫一切費用皆屬必需即在從前奏行定

價之內亦非冒銷可比至改運核減未完銀一百六十餘萬兩據范毓勳呈請分十二年完納經戶部議分八年臣等公同酌議定限五年倘限內不完請以家產變抵交刑部治罪奏入得旨依議著免其究治

夏四月丁卯

命核議李如柏等緣事罪案

上諭總理王大臣等曰李如柏達爾濟卓鼐周瑛各

有交辦之事著照大將軍慶復所奏四人俱仍留
軍前其如何施恩賞給職銜令其効力行走之處
著總理事務王大臣等以四人所得之罪分別輕
重議奏王大臣等議原任總兵官李如柏濫用公
帑草職以總兵官銜率換班綠旗兵往北路効
力自到鄂爾昆尚未著勞績今已給職銜應俟
所領兵換班時該部請

旨原任護軍統領達爾濟前以傷損馬匹牲畜又額

爾得尼招之役坐視賊人敗走過扎克拜達里
克不追草職以護軍當苦差現在鄂爾昆墾地
輸納應償米石原任提督周瑛於西藏領兵時
私買使婢又令兵丁歌唱刑部奏擬充軍奉

旨來京引見發往北路軍營効力贖罪又於白格爾駐
劄時被賊劫糧有

旨著枷示軍前責令償米尋蒙

恩釋免其應償米仍令責償今在鄂爾昆管理種地事

務按達爾濟周瑛未便遽給職銜請俟其還時
令大將軍以伊等在軍營効力與否報部請

旨原任寧夏將軍卓鼐前奏冬令不宜進兵請俟春
初馬匹飼肥進發查郎阿等議以進兵怯懦推
延時日奉

旨草職令在軍前効力按卓鼐愚昧妄奏情尚可恕應
否賞給職銜出自

聖恩奏入得

旨著賞給卓鼐副都統職銜令其効力餘依議

壬申

命以王常海瀾為叅贊大臣

上諭總理王大臣等曰副將軍常德叅贊大臣伊勒
慎俱因患病現今回京軍營乏人著王常海瀾俱
為叅贊大臣協同副將軍策凌辦事各賞銀二千
兩辦給行裝

乙亥

加恩鄂爾多斯貝勒扎木揚等復爵獎賞有差

總理王大臣等奏言鄂爾多斯貝勒扎木揚原襲郡王雍正十年率兵三千進勦兵丁沿途逃亡所辦馬匹亦不整齊納延泰奏請降為貝勒仍令率兵効力奉

旨扎木揚行走若好著大將軍奏聞又按扎木揚所襲王爵乃其曾祖顧魯率所屬兵丁攻取陝西榆林神木等城斬降賊寇著有勞績因得受封其

子東羅卜承襲王爵冊載子孫世襲罔替今大將軍慶復等奏扎木揚在軍前已經四年雖未著殊績尚知感激奮勉修治器械恪勤奉職可否給復原爵出自

聖恩台吉策旺多爾濟之子圖巴扎卜代父効力在軍數年保護官馬牲畜運送耕種器械稱職慶復奏請授為額外副台吉頭等副台吉額默根先於巴里坤率兵擒斬賊衆又在軍臺護運官

物此次協同扎木揚行走進獻驕馬又護送官馬五千至奈曼明安平郡王等稱其為人誠懇盡心公務應加寵錫以示鼓勵三人均應如所請奏入得

旨鄂爾多斯貝勒扎木揚此次前往軍營克贖前愆約束兵伍辦理馬匹整頓器械俱實心盡職念其祖父前勞著開復王爵額默根前次出兵効力行走此次又協助扎木揚竭誠効勞甚屬可嘉著賞

翎子以示寵異圖巴扎卜代父前往軍營殊盡心竭力黽勉効職著授本旗額外副台吉

丙戌

命議辦理臺站及喀爾喀游牧兵丁事宜

定邊大將軍慶復奏言臣等與喀爾喀副將軍等酌議安設卡倫每處於侍衛護軍中選一人專管再於喀爾喀四部中選賢能台吉一人協同辦理其台吉等月糧照例給與兵丁六月一

換喀爾喀內卡倫並如舊例每處揆章京一員
兵丁二十名於西三部落按佐領揆出其豫備
操演兵三千名於圖謝圖汗敦丹多爾濟部下
撥扎薩克一員副台吉三員官七員兵一千三
百六十二名於貝子成袞扎布部下撥扎薩克
一員副台吉二員官四員兵七百四十八名於
車臣汗達瑪琳部下撥扎薩克一員副台吉二
員官四員兵五百三十四名每名給馬三匹每

百人燾一杆十人旗一面五人帳房一架計兵
三千名內一千名給與烏鎗每年六月初旬齊
集鄂爾昆操演豫備九月撤巡哨兵時令各歸
本游牧處先是西邊三部落中共撥兵一萬二
百名於車臣汗部下撥牽駝兵六千嗣減一千
存五千合計一萬五千二百名除駐劄鄂爾昆
烏里雅蘇台一千五百名每年調往鄂爾昆操
演三千名尚餘兵萬餘令在本游牧處整練保

聚以備緩急之用有事易於調集器械務令整齊令副將軍與叅贊貝勒公等一年一次會閱每年出哨之兵各路並撥一百五十名每逢夏秋二季三路分發撥東三省營總三員率領前往其侍衛護軍等俱有管轄卡倫之責若復令出哨恐人不敷用請於在京新滿洲索倫巴爾處厄魯特等待衛中揀發十員以備差委三年期滿更換奏入得

旨著照所請行其初次查勘臺站著派叅贊大臣一員前往嗣後間歲派叅贊大臣一員往勘至喀爾喀游牧處豫備之兵其會集及檢閱器械著將軍叅贊大臣會議於叅贊大臣內派出一員會同喀爾喀副將軍叅贊貝勒公等公同閱視其將軍親自會閱之期幾年一次著額駙策凌酌定具奏命議酌軍營大臣等留撤事宜

總理王大臣等奏言本月十七日奉

旨前者軍興以來令大臣官員往駐蒙古邊疆辦理
事務今大兵既撤僅留駐兵一切防守事宜並已
減省其各處辦理駐劄之大臣官員有應撤者著
總理事務王大臣等議奏臣等查駐劄歸化城辦
事尚書通智駐劄西寧巡撫德齡散秩大臣塞
楞郎中三達禮員外郎五十七主事齊明駐劄
肅州內閣學士岱齊侍讀學士阿蘭泰駐劄哈
密員外郎達桑阿扎史駐劄西藏副都統馬拉

那蘇泰員外郎那遜額爾格圖駐劄呼倫貝爾
領侍衛內大臣哈達哈原任郎中伊特格爾以
上各官尚書通智本以歸化城都統根敦副都
統席爾塔悉赴軍營其地乏人是以遣往今根
敦席爾塔已各還所在應令通智俟修城駐兵
等事竣即行還京西寧原駐大臣一員辦理青
海蒙古番子事務兵興以來始增駐大臣章京
等今既撤兵應於德齡塞楞三達禮三員中留

一員餘並撤回至五十七齊明軍前歷年最久
應令理藩院奏請更換肅州辦理軍需較前亦
少應於岱齊阿蘭泰二員中留一員哈密駐劄
章京協同扎薩克辦事因一人不能換班又增
一員定例二年更代哈密現有駐兵達桑阿扎
史仍應留彼俟年滿更代西藏向無大臣官員
駐劄前以康濟鼐與頗羅鼐交惡相攻因遣大
臣率兵暫駐今達賴喇嘛還藏兵亦撤還毋庸

更駐大臣現今侍郎杭奕祿有事赴藏令其酌
辦奏到日再將瑪喇等定議進止哈達哈前往
軍營亦四載餘請交兵部於明年二三月間奏
請遣官赴呼倫貝爾更換伊特格爾亦令同還
奏入得

旨西寧著留德齡肅州著留阿蘭泰其通智承辦之
修城駐兵等事著令完畢再行具奏請旨餘依議

壬辰

布魯克巴部入貢

總理王大臣等奏言布魯克巴部諾顏林沁齊
壘喇卜濟感戴

皇恩親至西藏恭請

聖安獻珊瑚數珠一串所部織緞五匹伏思布魯克
巴乃藏外極遠部落林沁齊壘喇卜濟為其酋
長恭請

聖安奉獻表文請以所進物付部賞給如例外

恩賜粧蟒各一匹大緞三匹奏入得
旨依議再酌賞玻璃器數事

平定準噶爾方略前編卷四十一